

Tšimolohong

Bibele e qala tšimolohong, e leng lebaka leo e qalang ka lentsoe “Tšimolohong...” (Gen. 1:1). ‘Mokotaba oa khaolo eo, ehlile, ke phetolo ea lefatše ho tloha boemong boo le neng le “hloka sebopelo, le le feela” (Gen. 1:2) ho ba lefatše leo Molimo ka sebele sa Hae a ileng a le phatlalatsa le le “molemo haholo” (Gen. 1:31).Ka bokhutšoanyane, tšimoloho mona ke tšimoloho ea lefatše la rona.

Bala Genese 1. Leha ho ntse ho etsahala lintho tse ngata, ipotse potso ena: na ho na le moneketsana oa ho se hlophehe kapa tšohanyetso, kapa tsohle li etsoa ka tsela e hlophisehileng haholo ‘me tsohle li le nakong le sebakeng sa tsona se nepahetseng? Karabo ea hau e re’ng ka semelo sa Molimo?

Ellen G. White o ngotse hore “taolo ke molao oa pele oa Leholimo” (*Signs of the Times*, June 8, 1908); ho hlakile hore ho joalo le lefatšeng. Leha sebe se loebehlantse lefatše le tlhaho, ho fihle boemong bo itseng, taolo, morethetho, le tlhophelo li ntse li le teng.

Bala Genese 8:22. Taolo e bonahala joang le moo?

Le kamorá ho Oa, linako tsa selemo lia tla li fete ka tsela e nang le taolo—ka kakaretso. Kahona, hammoho le maseli a sebakeng sa maholimo, mohlala, letsatsi le khoeli, tse lokelang ho “ ‘arohanyaa motšearo ho bosiu . . . lipontšo tsa linako tse beiloeng, le tsa matsatsi le tsa lilemo’ ” (Gen. 1:14), ho teng hape linako tsa selemo, tsohle e le karolo ea morethetho oa tlhaho ea lefatše leo Molimo o le hlotseng. ‘Me kannete, leha re bonela lerothong hajoale, temana e kang Esaia 66:23 e supa hore le maholimong a macha le lafatšeng le lecha ho tla ‘ne ho be le morethetho.

Nahana kamoo Sabatha, ka tsela e bolokileng morethetho ka matla kateng e amang bophelo ba hau, haholo bophelo ba lelapa la hau, kamoo bo ka bang kateng. Ke melemo e feng eo e seng feela ea Sabatha empa le ea hore e tla ka nako e tšoanang?

Merethetho ea Bophelo

Boramahlale ba bua ka ntho e bitsoang merethetho ea liketsahalo tse iphetang kamorá lihora tse mashome a mabeli a metso e mene (ka nako e 'ngoe li bitsoa "litšupa-nako tsa 'mele) tse laolang tšebetso ea 'mele ea rona. Ka mantsoe a mang, ho na le morethetho o itseng o etsahalang le kahare ho 'mele ea rona ka boeona. Ka mokhoa o joalo, re pota-potiloe ke morethetho 'me e bile o teng le kahare ho rona..

Ke linako li fe tsa bophelo tse lepehang tse boletsoeng litemaneng tse latelang tsa Lengolo, 'me li hokahana ka kotloloho le bophelo ba lelapa joang?

Moek. 3:2 _____

Gen. 21:8, Baahl. 13:24 _____

Ps. 71:5, Liprov. 5:18 _____

Gen. 15:15, Baahl. 8:32 _____

Ps. 90:10 _____

Lipakeng tsa mathoko a buka ea bophelo, tsoalo le lefu, kaofela re feta hará linako tse ngata, tse fapaneng ho motho ka mong. Bana ba bang ha ba phele nako e telele kamorá tsoalo ea bona; ba bang ba hola ho fihlela ba e-ba batho ba baholo ba tsfetseng. Bana ba hola le ho ntlafala ka sekhahla sa bona. Ba bang ba tsamaea kapa hona ho bua pele ho ba bang. Ba bang ba tla atleha ho kena sekolo ba be ba hole ho ba barutehi, ha ba bang ba tla qeta nako ea bona ho etsa mesebetsi ea bona e meng esele. Ba bang ba tla ba le malapa, ha ba bang ba ke ke ba nyala kapa hona ho ba le bana. Ho na le li-bilione tsa batho lefatšeng, 'me leha ho na le tse ngata tseo re tšoanang ka tsona bohle (sheba Liketso 17:26), e mong le e mong oa rona ke motho ka bo mong, 'me ka mokhoa o joalo, ho tla ba le liphapano maphelong a rona ka bomong. Ka tsela e itseng, hape liphapano tsena li bohlokoa hobane li etsa hore e mong le e mong oa rona a ikhethe, e leng se boelang hore e mong le e mong oa rona o na le seo a ka arolelanang ka sona seo ba bang ba se nang sona. Ka bokhutšoananye, liphapano tsa rona li re lumella ho fetohela ba bang lehlohonolo. Mohlala, ba banyenyane le ba baholo ka bobeli ba ka una molemo ba bang ho ba bang: "Khanya ea ba bacha ke matla a bona, mokhabo oa maqheku ke moriri o moputsoa" (Liprov. 20:29). Mokhahlelo o fe kapa o fe oo re leng ho oona, ho sa natse le liphapano tsa rona, bohle re na le seo re ka fanang ka sona, e seng feela ho Morena, empa le e mong ho e mong.

Hore na maemo a hau a bophelo ke a fe hona joale, u ka etsa eng hore u fetohela e mong osele lehlohonolo? Hobaneng o sa etse boikitlaetso bo hlakileng ba ho ba lehlohonolo leo, haholo ho motho e mong ka lelapeng la hau [leno]?

Se sa Lebelloang

Bala Jobo 1:13–19, 2:7–9. Jobo o ile a hlalhoa ke'ng? Ke ka litsela li fe boiphihlelo ba hae bo bontšang se hlalhang e mong le e mong, ka tsela e 'ngoe kapa esele, kapa ka nako e 'ngoe kapa esele?

Filosofara ea mo-Gerike e bitsoang Heraclitus o kile a re “ha ho na ntho e sa fetoheng ntle le phetoho.” E re ha ho bonahala e ka tsohle li tsamaea hantle, ho etsahale se sa lebelloang. E ka ba tahlehelo ea mosebetsi, bokulo bo re isang liphateng tse chesang kapa lefung, ntlo e chang, kotsi ea koloi, ho oela ha u ntse o thapolla ntja ea lelapa maoto. Ehlile, ha se liphetoho tsohle tse lokelang ho ba tse bohloko. Mohlomong ho nyolloa mosebetsing ho tliša maemo a ntlafetseng a moruo. Kapa mohlomong u kopana le motho e mong eo e tla ba molekane oa hau, e leng phetoho eo ba bangata ba neng ba tla e amohela.

Ka tsela e fe kapa e fe, eo eka ba re tsamaea ka eona, leha e ka ba ea tloaelo, morethetho ha fetoha ka sekhahla kapa ka tsela e sa lebelloang, o sentsoe. Joang kapa joang Jobo o ne a sa lebella nako ena e ncha bophelong ba hae. Biblele e mo hlalosa e ne e le motho “ea tsamaeang ka ho loka le ka bokhabane, ea tšabang Molimo, ea sesefang bobē” (Jobo 1:1). Hape re tseba hoba o ne a nyetse, a bile a e-na le bara ba supileng le barali ba bararo, hape a ruile haholo (Jobo 1:2, 3). Nakong eo re fihlang bohareng ba buka, o se a bile le bonyane tahlehelo tse tšeletseng tse kholo: leroo la hae, basebetsi ba hae, bana ba hae, bophelo bo botle, tšebetso ea mohatsá hae, le khotatso ea metsoalle ea hae. Lefatše la hae le phethohile ‘me bophelo ba hae ba lelapa bo loebhelane.

Leha se ileng sa hlalaha Jobo se fetelletse haholo, ke mang hará rona ea so ka a hlalhoa ke tse sa lebelloang, ‘me e le ka tsela e mpe? Bophelo bo ka itsamaela hantle, e be hang ka tšohanyetso ho se le tlhokomeliso, lintho li fetoha ka botlalo, ‘me maphelo a rona—le maphelo a malapa a rona—ha a sa tla boela a tšoane. Hona ha se ntho e ncha. E ka ‘na ea ba Abele o ná sa lebella ho bolaoa, le Josefa o ná sa lebelloa ho rekisoa Egepete e le lekhoba. Lipaleng ka bobeli, litho tsa lelapa e ne e le tsona baeki, hape lipaleng ka bobeli malapa a ne a amehile haholo ke se hlalhetseng litho tse ling tsa lelapa. Lengolo le tletse mehlala ea bao maphelo a bona, le malapa, a ileng a fetoloa haholo ke se neng se sa lebelloa.

Tumelo ea hau e u thusitse joang hará litoko tse ileng tsa senya morethetho oa bophelo ba hau ka tsela e sa lebelleheng?

Lipheto ho

Taba ea 'nete ke hore batho ba atisa ho ba libopuo tse nang le litloaelo. 'Me ehlile re atisa ho tsitsa litseleng tsa rona, 'me ha re ntse re tsofala, ho ba thata ho feta ho fetola mekhoa eo. Kannete, ha re fetohle habonolo. Ka basali ba ba kae bao esaleng ba tletleba ka lilemo, "ke lekile ho fetola monna oa ka, empa. . ." Leha hole joalo, Molimo o tšebetsong ea ho re fetola, haeba e se ha kaalo sebopelo sa rona, ke limelo tsa rona. Ke boholo ba seo morero oa pholoho o leng sona: Molimo o re etsa batho ba bacha ho Eena.

Ke phetoho e fe e khoho e ileng ea etsahalla Paulose oa Tarshishe, 'me e ile ea etsahala joang? Liketso 8:1, 3; 9:1–22; Ba-Gal. 1:15–17.

"Joalo ka ha Saule a ile a inehela ka botlalo matleng a kholisang a Moea o Halalelang, o ile a bona liphoso tsa bophelo ba hae, 'me a bona meeli e pharalletseng ea moalo oa Molimo. Eo e neng e le Mofarisi ea ikhohomolang a na le sebete sa hore o lokafatsoa ka mesebetsi ea hae e molemo, joale a inama kapele ho Molimo ka boikokobetso le bonolo ba ngoana e monyenyanane, a bolela ho se tšoanelehe ha hae 'me a kopa makhabane a Mopholosi ea thakhisitsoeng a ba a tsoha. Saule o ne a labalabela ho ba kutloanong le puisanong le Ntate le Mora; 'me botebong ba takatso ea hae bakeng sa tšoarelo le kananelo o ile a etsa kopo tse khelohileng. . . .

"Lithapelo tsa Mofarisi ea neng a kopa ka tieo ha lia ka tsa fetoha lefeela. Mehopolo le maikutlo a tebileng a pelo ea hae a ile a fetoloa ke mohau oa Molimo; 'me mehopolo ea kelello ea hae e khabane ka ho fetisa e ile ea lumellana le sepheo sa bosafeleng sa Molimo. Ho Saule, Krete le ho loka ha Hae li ile tsa fetoha tsohle ho eena."—Ellen G. White, *The Acts of the Apostles*, maq. 119, 120.

Leha lipale tsa rona tsa tšokoloho li sa fihlele sa Paulose ka matla, bohle re lokela ho ba le lipale tsa rona, boiphihlelo ba kamoo Molimo a sebelitseng kateng maphelong a rona ho re fetola, ho re etsa motho ea mosa eo re tsebang hore re lokela ho ba eena. E, sepheo se ka ba se lelele, 'me ka linako tse ling ho bonolo ho ipotsa hore na re tla feela re fetohle na. Linakong tse tšoanang le tsona, ke litemana tse peli tsa Bibeletseo ho leng bohlokoa ho nahana ka tsona le ho itšoaella ka tsona.

Bala Ba-Filipi 1:6 le Ba-Roma 8:1. Ke litšepiso li fe tse peli tse khoho tse fumanehang litemaneng tsee, 'me li kopana hammoho joang boiphihlelong ba Mokreste?

Likopa-kopano

Bibele ke buka ea likamano. Molimo o re bopile hore re be likamanong le ba bang. Kannete, ke ba fokolang ba rona ba phelang boinotšing. Qalong, ha ho ea mong oa rona ea neng a ka ba teng ha e se ka ba ba bang. Le kamorá tsoalo, re hloka ba bang hore ba re hlokomele, bonyane ho fihlela lilemo tse itseng, moo bonyane ka tšoanelo, re ka iphelisang ka borona. Leha re ka etsa joalo, ke mang ea neng a ka batla ho etsa joalo? Bongata ba rona re hloka le ho laba-labela boteng ba batho ba bang. Leha liphoofole tseo e bang metsoalle ea motho joalo ka ntja, li ka re tlosa bolutu, qetellong, likamano tse tebileng tse nang le moelelo ka ho fetisisa ke tse fumanehang kopa-kopanong le batho ba bang. Ha ho makatse kahona hore lelapa, le likamano tsa lelapa, li bohlokoa haholo bophelong ba rona. Kahobane ba bangata ba rona rea kopa-kopana, hangata nako eohle, le ba bang, likopa-kopano tsena li ka ama ebile li ama liphetoho le merethetho ea maphelo a rona. Rona, khabareng, likopa-kopanong tsa rona le ba bang re ka ama maphelo a bona. E ka ba rea hlokomela kapa che ('me hangata ha re hlokomele), likopa-kopano tseo, ka tsela e fe kapa e fe eo li lebileng ho eona, li ka ba molemo kapa tsa ba mpe. Ho molemo ha ka kang ho rona ha ho le joalo hee ho itokisa esale pele, ka linako tsohle, hore tšusumetso ea rona e ke keng ea qojoa ho ba bang e be e molemo, haholo ho bao re atamelaneng le bona ka ho fetisisa, e leng kamehla litho tsa lelapa la rona.

Bala litimana tse latelang. Li re bolella hore re etse joang likopa-kopanong le ba bang? Ba-Roma 15:7; Ba-Ef.4:2, 32; 1 Ba-Thes. 3:12; Jakobo 5:16.

Ka litsela tse ngata, tšiea ena e bonolo. Ha re itšoara hantle, ka mosa, le lereko ho ba bang, re tla ba le tšusumetso e molemo ho bona, ho fihlela le boemong boo re ka fetolang maphelo a bona ka tsela e molemo. Joalo ka ha Jesu a fetola maphelo a batho ka tsela e molemo haholo, ke monyetla o mo ka kang ho etsetsa ba bang se tšoanang, le rona. Hape, re lokela ho hopola: tšusumetso ea rona e tl'o ba molemo kapa e be mpe, le ka litsela tse sa totobalang. 'Me ha ho sebaka seo ho sona tšusumetso, e le e masene kapa che, e bonahalang haholo ho feta malapeng a rona.

Talima lipolelo tse peli tse latelang tsa Jesu: Luka 11:34 le Mareka 4:24, 25. Li reng ka bohlokoa ba kamoo re kopa-kopanang le ba bang?

Khopolo e Eketsehileng:

Nahana ka liphetoho tse etsahetseng bophelong ba barutuo ba Kreste ha ba ntse ba qeta nako le Eena. Boholo ba bona ba ne ba sa ruteha, e le batho ba tloaelehileng, ba tloaetseng lithuto le litloaelo tsa tumelo ea bona ea se-Juda, empa joale ba qholotsoa ke Rabi enoa oa Galilea. Ba ile ba ba le boiphilehlo ba mona (Matt. 20:20–24) le likhohlano (Johanne 3:25); ba ile ba bonahala ba se na tumelo (Mareka 9:28, 29), ba ile ba ba ba nyahlatsa (Matt. 26:56) le ho eka Jesu (Matt. 26:69–74). Ka nako e tsoanang, ba ne ba ntse ba hola moeng hoo batho ba ileng ba eelloa hore Petrose o kile a tsamaea le Jesu (Matt. 26:73), le litho tsa lekhotla la Sanhedrine ba ile ba hlolloa ha ba hlokomela hore Petrose le Johanne bao e neng e le batho “ba sa rutehang, e le batho feela.” “Ba lemoha hobane ba kile ba tsamaea le Jesu” (Liketso 4:13). Nahana hape, ka tšusumetso e ntle eo re neng re ka ba le eona malapeng a rona haeba re ne re phela ka tsela eo ba bang ba litho tsa lelapa ha ba re bona, ba neng ba tla tseba hobane “re kile ra tsamaea le Jesu.” Mantsoe a Ellen G. White a reng ka tšusumetso lapeng? “Lelapa e ka ba le topileng, empa e ka ba sebaka seo ho sona mantsoe a khothatso a buuoang teng le mo liketso tse mosa li etsoang teng, moo boikokobetso le lerato e leng baeti ba kamehla.”—*The Adventist Home*, leq. 18.

Lipotso tsa Puisano:

- 1. Bala Moekesesia 3:1–8. Litemana tsee li re’ng, ‘me u ka sebelisa tšiea e hlahang moo bophelong ba hau le maiphihlelo joang?**
- 2. Sehlopheng, buisanang ka a mang a maiphihlelo a fetolang bophelo ao le fetileng ho oona, buisanang ka lithuto tseo le ithutileng tsona, haeba li ameha, le lithuto tseo u ka beng u ithutile tsona eaba ha u ithute tsona. U ile oa ithuta eng lithutong tseo u neng u sa li tsebe? Buisanang hape ka hore na maiphihlelo ana a fetolang bophelo a amme lelapa la hau joang. U ithutile lithuto li fe le maemong aa?**
- 3. Ke litsela li fe tseo u phelang ka tsona kajeno, tseo e neng e se tsa Kreste bophelong ba hau, tseo li ka beng li fapane haholo le kamoo li leng kateng kajeno? Se se lokela ho u bolella eng ka matla a Kreste a ho re fetola?**